

নং- ৩৮.০০৮.০২২.০০.০০.০০২.২০১১-১৩১

২০ ফাল্গুন ১৪২৫

তারিখ:-----

০৪ মার্চ ২০১৯

সরকারি প্রাথমিক বিদ্যালয়ের শিক্ষক বদলি নির্দেশিকা (সংশোধিত)

এই নির্দেশিকা ‘সরকারি প্রাথমিক বিদ্যালয়ের শিক্ষক বদলি নির্দেশিকা, ২০১৮ (সংশোধিত) নামে অভিহিত হবে।

১.০ বদলির সময়কাল :

- ১.১- সাধারণভাবে প্রধান শিক্ষক ও সহকারী শিক্ষকদের প্রতি শিক্ষা বছরের জানুয়ারি-মার্চ মাসের মধ্যে একই উপজেলা/থানা, আন্তঃউপজেলা/থানা, আন্তঃজেলা, আন্তঃবিভাগ ও যে কোন উপজেলা/জেলা হতে সিটি কর্পোরেশনে বদলি করা যাবে;
- ১.২- বদলির সময়কাল ব্যতিত অন্য যে কোন সময়ে কোন বিদ্যালয়ের প্রধান শিক্ষকের পদ শূন্য হলে উক্ত পদ নিয়োগ প্রক্রিয়ার মাধ্যমে তাত্ক্ষণিক পূরণ করা সম্ভব না হলে বিভাগীয় উপ-পরিচালক নিজ অধিক্ষেত্রে ও সংশ্লিষ্ট সিটি কর্পোরেশন এলাকার মধ্যে এবং মহাপরিচালক, প্রাথমিক শিক্ষা অধিদপ্তর প্রধান শিক্ষক পদে আন্তঃবিভাগ বদলি করতে পারবেন;

২.০ বদলির কর্তৃপক্ষ :

- ২.১- জেলা প্রাথমিক শিক্ষা অফিসার তার নিজ অধিক্ষেত্রে একই উপজেলার মধ্যে সংশ্লিষ্ট উপজেলা/থানা শিক্ষা অফিসারের সুপারিশক্রমে সহকারী শিক্ষকদের আন্তঃবিদ্যালয় বদলির অনুমোদন প্রদান করতে পারবেন। জেলা প্রাথমিক শিক্ষা অফিসারের অনুমোদন গ্রহণপূর্বক উপজেলা/থানা শিক্ষা অফিসার এরূপ বদলির আদেশ জারি করবেন;
- ২.২- জেলা প্রাথমিক শিক্ষা অফিসার তার নিজ অধিক্ষেত্রে আন্তঃউপজেলা/থানার মধ্যে সংশ্লিষ্ট উপজেলা/থানা শিক্ষা অফিসারের সুপারিশক্রমে সহকারী শিক্ষকদের বদলি করতে পারবেন;
- ২.৩- একই সিটি কর্পোরেশনের আওতাধীন নির্দিষ্ট একটি থানার মধ্যে বা আন্তঃথানার মধ্যে বদলির ক্ষেত্রে সংশ্লিষ্ট থানা শিক্ষা অফিসারের সুপারিশক্রমে সহকারী শিক্ষকদের জেলা প্রাথমিক শিক্ষা অফিসার এবং প্রধান শিক্ষকদের সংশ্লিষ্ট থানা শিক্ষা অফিসার ও জেলা প্রাথমিক শিক্ষা অফিসারের সুপারিশক্রমে বিভাগীয় উপ-পরিচালক বদলি করতে পারবেন। সহকারী শিক্ষক/প্রধান শিক্ষকদের সিটি কর্পোরেশনের বাইরে থেকে (যে কোন জেলা/উপজেলা/থানা) সিটি কর্পোরেশনের মধ্যে বদলি করতে হলে উপজেলা/থানা শিক্ষা অফিসার, জেলা প্রাথমিক শিক্ষা অফিসার এবং বিভাগীয় উপপরিচালকের সুপারিশক্রমে মহাপরিচালক, প্রাথমিক শিক্ষা অধিদপ্তর বদলি করতে পারবেন। তবে আন্তঃসিটি কর্পোরেশন বদলি বন্ধ থাকবে;
- ২.৪- বিভাগীয় উপ-পরিচালক তার নিজ অধিক্ষেত্রে সংশ্লিষ্ট উপজেলা/থানা শিক্ষা অফিসার/জেলা প্রাথমিক শিক্ষা অফিসারের সুপারিশক্রমে সহকারী শিক্ষকদের আন্তঃজেলা বদলি করতে পারবেন;
- ২.৫- বিভাগীয় উপ-পরিচালক তার নিজ অধিক্ষেত্রে উপজেলা শিক্ষা অফিসার ও জেলা প্রাথমিক শিক্ষা অফিসারের সুপারিশক্রমে প্রধান শিক্ষকদের একই উপজেলা, আন্তঃউপজেলা এবং আন্তঃজেলা বদলি করতে পারবেন;
- ২.৬- মহাপরিচালক, প্রাথমিক শিক্ষা অধিদপ্তর জেলা প্রাথমিক শিক্ষা অফিসার ও বিভাগীয় উপ-পরিচালকের সুপারিশক্রমে যে কোন সময় যৌক্তিক কারণে/বিশেষ বিবেচনায় জনস্বার্থে প্রধান শিক্ষক ও সহকারী শিক্ষকদের বদলি করতে পারবেন;

৩.০ বদলির সাধারণ শর্তাবলী :

- ৩.১- শিক্ষক বদলির ক্ষেত্রে সিটি কর্পোরেশন ও উপজেলাকে একক ইউনিট হিসেবে বিবেচনা করতে হবে। আন্তঃসিটি কর্পোরেশন বদলি বিবেচিত হবে না।
- ৩.২- পৌরসভা সংশ্লিষ্ট উপজেলার একই ইউনিট হিসেবে বিবেচিত হবে।
- ৩.৩- সহকারী শিক্ষক পদে চাকরির মেয়াদ ন্যূনতম ২ (দুই) বছর পূর্ণ হলে এবং পদ শূন্য থাকলে আন্তঃউপজেলা/থানা, আন্তঃজেলা ও আন্তঃবিভাগ বদলি করা যাবে। যে কোন জেলা/উপজেলা হতে যে কোন সিটি কর্পোরেশনে বদলি করা যাবে। তবে, উক্ত ২(দুই) বছরের মধ্যে একই উপজেলা/থানায় পদ শূন্য হলে বদলি করা যাবে। এছাড়াও, যে কোন বদলির পর ৩(তিন) বছর অতিক্রান্ত না হলে কোনো শিক্ষক পুনঃবদলির জন্য বিবেচিত হবেন না;
- ৩.৪- প্রধান শিক্ষক বা কোন সহকারী শিক্ষক প্রধান শিক্ষক পদে পদোন্নতিপ্রাপ্ত হলে, উক্ত পদে তার চাকরির মেয়াদ ২ (দুই) বছর পূর্ণ হলে, পদ শূন্য থাকা সাপেক্ষে আন্তঃউপজেলা/থানা, আন্তঃজেলা, আন্তঃসিটি কর্পোরেশন এবং আন্তঃবিভাগ বদলি করা যাবে। তবে, উক্ত ২(দুই) বছরের মধ্যে একই উপজেলা/থানায় পদ শূন্য হলে বদলি করা যাবে। এক্ষেত্রেও বদলির পর ৩(তিন) বছর অতিক্রান্ত না হলে কোনো শিক্ষক পুনঃবদলির জন্য বিবেচিত হবেন না;
- ৩.৫- যে সকল বিদ্যালয়ে ৪(চার) জন বা তার কম সংখ্যক শিক্ষক কর্মরত আছেন কিংবা শিক্ষক ছাত্র অনুপাত ১:৪০ এর বেশি রয়েছে, সে সকল বিদ্যালয় থেকে শিক্ষক প্রতিস্থাপন না করা পর্যন্ত সাধারণভাবে শিক্ষক বদলি করা যাবে না;
- ৩.৬- কোটা অনুযায়ী উপযুক্ত প্রার্থী না পাওয়ায় শূন্য পদ পূরণের লক্ষ্যে যে সকল শিক্ষককে সরকারি প্রাথমিক বিদ্যালয় শিক্ষক নিয়োগবিধিমালা, ১৯৯১-এর ৭(১)(খ) বিধি অনুসারে ইতঃপূর্বে নিজ উপজেলা/থানার অন্য জেলা/সিটি কর্পোরেশন বা বিভাগে নিয়োগ দান করা হয়েছে তারা তাদের নিজ উপজেলা/থানায় বদলি হতে ইচ্ছা পোষণ করলে তাদের নিজ নিজ উপজেলা/থানায় বদলি করা যাবে। এছাড়া, জাতীয়করণকৃত শিক্ষকদের মধ্যে যারা নিজ উপজেলার বাহিরে নিয়োগ লাভ করেছেন তাদের নিজ উপজেলা/থানায় বদলি হতে ইচ্ছা পোষণ করলে তাদের নিজ নিজ উপজেলা/থানায় বদলি করা যাবে। এরূপ বদলির ক্ষেত্রে অনুচ্ছেদ ৩.৩ ও ৩.৪ এ বর্ণিত চাকরি মেয়াদের শর্ত বা বহিরাগত শিক্ষক হিসেবে অনুচ্ছেদ ৩.১১- এ বর্ণিত ২০% পূরণের শর্তটি প্রযোজ্য হবে না;
- ৩.৭- কোন শিক্ষকের নিয়োগপত্রে উল্লিখিত স্থায়ী ঠিকানা জেলা সদরের পৌরসভা, জেলা সদর বা সিটি কর্পোরেশনধীন এলাকা হওয়া সত্ত্বেও পদ শূন্য না থাকার জন্য তাদেরকে জেলা সদরের পৌরসভা, জেলা সদর বা সিটি কর্পোরেশনের বাইরে পদায়ন করা হয়েছে, তারা বদলির ইচ্ছা পোষণ করলে পদ শূন্য থাকা সাপেক্ষে তাদেরকে নিজ স্থায়ী ঠিকানায় বদলি করা যাবে। এরূপ বদলির ক্ষেত্রে অনুচ্ছেদ ৩.৩ ও ৩.৪ এ বর্ণিত চাকরি মেয়াদের শর্ত বা বহিরাগত শিক্ষক হিসেবে অনুচ্ছেদ ৩.১১- এ বর্ণিত ২০% পূরণের শর্তটি প্রযোজ্য হবে না;
- ৩.৮- নদী ভাঙ্গন/ অন্য কোনো প্রাকৃতিক দুর্যোগের পরিপ্রেক্ষিতে কোনো শিক্ষকের বসতভিটা বিলীন হওয়ার ফলে স্থায়ী ঠিকানা পরিবর্তিত হলে বা কোনো উপজেলা/থানা/পৌরসভা/সিটি কর্পোরেশন প্রশাসনিক পুনর্গঠনের কারণে কোনো শিক্ষকের স্থায়ী ঠিকানা এবং কর্মস্থলের ঠিকানা পরিবর্তিত হয়ে দুটো ভিন্ন উপজেলা/থানা পৌরসভার অন্তর্ভুক্ত হলে উক্ত শিক্ষককে নিজ স্থায়ী ঠিকানায় বদলি করা যাবে। এক্ষেত্রে, সংশ্লিষ্ট উপজেলার সহকারী কমিশনার (ভূমি) এবং ইউনিয়ন পরিষদ চেয়ারম্যান/ওয়ার্ড কাউন্সিলরের প্রত্যয়নপত্র, স্থায়ী ঠিকানার জমির দলিল ও খতিয়ান, বাড়ির হোল্ডিং নম্বর (সিটি কর্পোরেশন এলাকার জন্য), ভূমি উন্নয়ন কর পরিশোধের রশিদ, পৌর/ ইউনিয়ন পরিষদ কর পরিশোধের রশিদসহ আবেদন করতে হবে;
- ৩.৯- উপজেলা/থানায় কোনো পদ শূন্য হলে সংশ্লিষ্ট উপজেলা/থানার অধিবাসী প্রার্থীগণ সেই পদে বদলির জন্য অগ্রাধিকার পাবেন। তবে, একাধিক পদ শূন্য থাকলে অন্য উপজেলা/থানা/জেলা/সিটি কর্পোরেশন/বিভাগের শিক্ষকগণও একইভাবে বদলির জন্য বিবেচিত হতে পারবেন। এ বিষয়ে সংশ্লিষ্ট উপজেলা/থানা শিক্ষা অফিসার তার নিজ অধিক্ষেত্রের বিদ্যালয়ের প্রধান শিক্ষক ও সহকারী শিক্ষকদের বিদ্যালয়ভিত্তিক শূন্য পদের তথ্যাদি

প্রধান শিক্ষকদের ডিসেম্বর-মার্চ মাসে অনুষ্ঠিত মাসিক সমন্বয় সভায় ঘোষণা করবেন এবং বহল প্রচারের নিমিত্ত তা উপজেলা/থানা শিক্ষা অফিসের নোটিশ বোর্ডে প্রদর্শনের ব্যবস্থা করবেন;

- ৩.১০- উপজেলা/থানার মধ্যে একই পদে একাধিক আগ্রহী প্রার্থী থাকলে তাদের মধ্যে চাকরির জ্যেষ্ঠতা ও দক্ষতার ভিত্তিতে অগ্রাধিকার নির্ধারণ করতে হবে। সংশ্লিষ্ট উপজেলা/থানা শিক্ষা অফিসার জ্যেষ্ঠতা ও দক্ষতার ভিত্তিতে আবেদনকারীদের তালিকা প্রণয়ন করে উপজেলা/থানা শিক্ষা অফিসের নোটিশ বোর্ডে কমপক্ষে ৭ কর্মদিবস প্রদর্শনের ব্যবস্থা করবেন।
- ৩.১১- উপজেলা/সিটি কর্পোরেশনের মোট পদের সর্বাধিক ২০% পদে সংশ্লিষ্ট উপজেলা/সিটি কর্পোরেশনের বাইরে থেকে উপযুক্ত শিক্ষক পদ শূন্য সাপেক্ষে বদলি করা যাবে। এসব ক্ষেত্রে সংশ্লিষ্ট উপজেলা শিক্ষা অফিসার তাঁর উপজেলাধীন বিদ্যালয়ের বাইরে থেকে বদলিকৃত শিক্ষকদের হালনাগাদ তালিকা সংশ্লিষ্ট রেজিস্টারে সংরক্ষণ করবেন।
- ৩.১২- প্রতিবন্ধী ব্যক্তির অধিকার ও সুরক্ষা আইন ২০১৩-এর ৩ ধারায় সংজ্ঞায়িত প্রতিবন্ধীদের ক্ষেত্রে শারীরিক ও মানসিক সক্ষমতা বিবেচনায় অগ্রাধিকার ভিত্তিতে বদলি করা যাবে। শিক্ষকের সন্তান প্রতিবন্ধী হলে তিনিও এই সুবিধা পাবেন।

৪.০ বৈবাহিক কারণে বদলি:

- ৪.১- চাকুরি লাভের পূর্বে এবং চাকুরি লাভের পর বিবাহ বন্ধনে আবদ্ধ হয়েছেন এমন শিক্ষক স্বামী / স্ত্রীর স্থায়ী ঠিকানায় বদলি হতে ইচ্ছুক হলে তাদের আবেদনের পরিশ্রেণিকিতে শূন্য পদের বিপরীতে বদলি করা যাবে। তবে এ ধরনের বদলির ক্ষেত্রে বিবাহের সময় স্বামী/স্ত্রীর যে স্থায়ী ঠিকানা ব্যবহার করা হয়েছে ঐ ঠিকানায় বদলির ক্ষেত্রে অনুচ্ছেদ ৩.১১ এ বর্ণিত ২০% পূরণের শর্তটি প্রযোজ্য হবে না। তবে, একটি শূন্য পদের বিপরীতে একাধিক আবেদনকারী থাকলে আবেদনকারীদের চাকরির জ্যেষ্ঠতা ও দক্ষতা বিবেচনা করে সিদ্ধান্ত নিতে হবে। এরূপ বদলির ক্ষেত্রে স্বামী/স্ত্রীর স্থায়ী ঠিকানার স্বপক্ষে বিয়ের কাবিননামা /প্রত্যয়নপত্র, সংশ্লিষ্ট পৌর মেয়র/ ইউনিয়ন পরিষদ চেয়ারম্যান / ওয়ার্ড কাউন্সিলর এর প্রত্যয়নপত্র, স্বামী/স্ত্রীর স্থায়ী ঠিকানার জমির দলিল, খতিয়ান, বাড়ির হোল্ডিং নম্বর (সিটি কর্পোরেশন এলাকার ক্ষেত্রে) এবং ভূমি উন্নয়ন কর পরিশোধের রশিদসহ আবেদন করতে হবে;
- ৪.২- বিধবা বা তালাকপ্রাপ্তা শিক্ষক তাঁর স্থায়ী/বর্তমান ঠিকানায় বদলি হতে পারবে এবং বিধবা বা তালাকপ্রাপ্তা শিক্ষক পুনরায় বিবাহবন্ধনে আবদ্ধ হলে স্বামীর স্থায়ী/বর্তমান ঠিকানায় বদলি হতে ইচ্ছা পোষণ করলে কাবিননামা/ প্রত্যয়নপত্রসহ লিখিত আবেদনের ভিত্তিতে পদ শূন্য থাকা সাপেক্ষে বদলি করা যাবে। এরূপ বদলির ক্ষেত্রে নিজের স্থায়ী/বর্তমান ঠিকানার স্বপক্ষে এবং স্বামীর স্থায়ী ঠিকানার স্বপক্ষে সংশ্লিষ্ট পৌর মেয়র/ইউনিয়ন পরিষদ চেয়ারম্যান/ওয়ার্ড কাউন্সিলর এর প্রত্যয়নপত্র, স্বামীর স্থায়ী ঠিকানার জমির দলিল ও খতিয়ান, বাড়ির হোল্ডিং নম্বর (সিটি কর্পোরেশন এলাকার ক্ষেত্রে) ভূমি উন্নয়ন কর পরিশোধের রশিদসহ আবেদন করতে হবে;
- ৪.৩- বিধবা বা তালাকপ্রাপ্তা শিক্ষককে তার আবেদনের ভিত্তিতে পিতার স্থায়ী ঠিকানায় অথবা তার বর্তমান স্থায়ী ঠিকানায় বদলি করা যাবে। এক্ষেত্রে পিতার/তার বর্তমান স্থায়ী ঠিকানার স্বপক্ষে সংশ্লিষ্ট পৌর মেয়র/ ইউনিয়ন পরিষদ চেয়ারম্যান/ ওয়ার্ড কাউন্সিলর প্রত্যয়নপত্র, পিতার স্থায়ী ঠিকানার জমির দলিল, খতিয়ান এবং ভূমি উন্নয়ন কর পরিশোধের রশিদসহ আবেদন করতে হবে;
- ৪.৪- কোন শিক্ষকের স্ত্রী/স্বামী সরকারি, আধা সরকারি ও স্বায়ত্বশাসিত প্রতিষ্ঠানসহ বেসরকারি প্রতিষ্ঠানে চাকুরি করলে তাকে স্ত্রী/স্বামীর কর্মস্থলে বদলির সুযোগ দেয়া যেতে পারে। তবে এ সুযোগ তারা সমগ্র চাকরিকালে সর্বোচ্চ ২ (দুই) বার গ্রহণ করতে পারবেন;

৫.০ প্রশাসনিক কারণে বদলি :

- ৫.১- জনস্বার্থে/প্রশাসনিক প্রয়োজনে যে কোন সময় যে কোন শিক্ষককে বদলি করা যাবে। তবে, এরূপ বদলির ক্ষেত্রে অনুচ্ছেদ ১.০-এ বর্ণিত বদলিকালে সংশ্লিষ্ট উপজেলা/থানা শিক্ষা অফিসার/জেলা প্রাথমিক শিক্ষা অফিসার/বিভাগীয় উপ-পরিচালকগণ তাদের নিজ নিজ উর্দ্ধতন কর্তৃপক্ষের অনুমোদন গ্রহণ পূর্বক বদলি করতে

পারবেন। তবে বদলিকাল ব্যতীত অন্য সময়ে মহাপরিচালক, প্রাথমিক শিক্ষা অধিদপ্তরের অনুমোদন সাপেক্ষে বদলি করা যাবে;

৫.২- প্রশাসনিক কারণে বদলি হওয়ার ৩(তিন) বছরের মধ্যে কোনো শিক্ষক পুনঃবদলির জন্য আবেদন করতে পারবেন না;

৬.০ সমন্বয় বদলি:

৬.১- জেলা প্রাথমিক শিক্ষা অফিসার তাঁর নিজ অধিক্ষেত্রে ৩১ ডিসেম্বরের মধ্যে একই উপজেলার বিদ্যালয় সমূহের মধ্যে শ্রেণিকক্ষ/শিক্ষক-ছাত্র সংখ্যার অনুপাত শিক্ষকদের সুসম বন্টন নিশ্চিত করার প্রয়োজনে উপজেলা শিক্ষা অফিসারের সাথে আলোচনা, পর্যালোচনা ও সুপারিশের আলোকে বিদ্যালয়ভিত্তিক শিক্ষক সমন্বয় ও বিদ্যালয়ওয়ারী শ্রেণিকক্ষ ও শিক্ষক সংখ্যা নির্ধারণ করে তা উল্লেখপূর্বক আদেশ জারি করবেন;

৬.২- অনু: ৬.১ এর আদেশ জারির পরেই শিক্ষক সমন্বয়ের আলোকে প্রশাসনিক/ সমন্বয়ের প্রয়োজনে স্বপ্রণোদিত হয়ে অথবা শিক্ষকের আবেদনের ভিত্তিতে বদলির প্রস্তাবনা প্রণয়ন করবেন;

৬.৩- বিভাগীয় উপপরিচালক বিষয়টি যাচাইবাছাই করে মহাপরিচালক, প্রাথমিক শিক্ষা অধিদপ্তর বরাবর এ ধরনের বদলির প্রস্তাব প্রেরণ করবেন;

৬.৪- শিক্ষক-ছাত্র অনুপাত এবং শ্রেণিকক্ষ-ছাত্র অনুপাত ১:৪০ এর বেশী হলে কোন শিক্ষককে সমন্বয়ের প্রয়োজনে বদলি করা যাবে না;

৬.৫- ৫(পাঁচ) বা তার কম শিক্ষক বিশিষ্ট বিদ্যালয় থেকে সমন্বয়ের প্রয়োজনে কোনো শিক্ষককে বদলি করা যাবে না;

৬.৬- সমন্বয় বদলির ক্ষেত্রে চাকরিতে জ্যেষ্ঠ শিক্ষকদের পছন্দকে অগ্রাধিকার দিতে হবে। জ্যেষ্ঠ শিক্ষকগণ বদলি হতে ইচ্ছা পোষণ না করলে কনিষ্ঠদের বদলি করা যাবে;

৬.৭- অবসর উত্তর ছুটিতে (পিআরএল) গমনের পূর্ববর্তী ১(এক) বছর সময়ের মধ্যে কোনো শিক্ষককে তার আবেদন ছাড়া সমন্বয় বদলি করা যাবে না;

৬.৮- ৬ষ্ঠ থেকে ৮ম শ্রেণি পর্যন্ত শিক্ষা কার্যক্রম চালু রয়েছে এরূপ প্রাথমিক বিদ্যালয়ে প্রয়োজনে শিক্ষক বদলিপূর্বক সমন্বয় করা যাবে;

৭.০ সংযুক্তি :

৭.১ ডিপি-ইন-এড/সি-ইন-এড প্রশিক্ষণে এক বা একাধিক শিক্ষকের যোগদানের কারণে কিংবা কোন শিক্ষকের সাময়িক বরখাস্তজনিত শূন্য পদে বা মাতৃভজনিত ছুটির কারণে শিক্ষক স্বল্পতা হেতু কোনো বিদ্যালয়ের পাঠদান বিঘ্নিত হওয়ার কারণে উপজেলা/থানা শিক্ষা অফিসারের প্রস্তাবের ভিত্তিতে জেলা প্রাথমিক শিক্ষা অফিসার সুনির্দিষ্ট সময়ের জন্য (মেয়াদ উল্লেখপূর্বক) সংযুক্তির আদেশ প্রদান করবে। মেয়াদ শেষে স্বয়ংক্রিয়ভাবে সংযুক্তির আদেশ বাতিল হবে। একই শিক্ষককে একাধিক বার সংযুক্তি দেওয়া যাবে না। সংযুক্তির আদেশকারী কর্তৃপক্ষ সংযুক্তিতাদেশ বাতিল করতে পারবে। তবে সংযুক্তিতাদেশ প্রদানকারী কর্তৃপক্ষের উর্ধ্বতন কর্তৃপক্ষ জনস্বার্থে বা প্রশাসনিক কারণে সংযুক্তিতাদেশ বা প্রেষণাদেশ বাতিল করতে পারবে।

৮.০ বিবিধ :

৮.১- কোনো শিক্ষক চাকুরিরত অবস্থায় জীবনঘাতি ব্যাধিতে আক্রান্ত হলে উক্ত শিক্ষকের চিকিৎসার সুবিধার্থে তাঁর চিকিৎসা সংক্রান্ত কাগজপত্র যাচাই সাপেক্ষে অন্যত্র বদলি করা যাবে।

৮.২- কোনো শিক্ষক দুর্গম এলাকার (হাওড়, চর, চা বাগান, পাহাড়ী এলাকা, উপকূলীয় এলাকা কিংবা বিচ্ছিন্ন দ্বীপ অঞ্চল ইত্যাদি) একই বিদ্যালয়ে ২(দুই) বছর কর্মরত থাকলে একমাত্র স্বেচ্ছায় তাঁর আবেদনের প্রেক্ষিতে অগ্রাধিকার ভিত্তিতে একই উপজেলার সুবিধাজনক বিদ্যালয়ে বদলি করা যাবে। তবে শিক্ষক ইচ্ছা পোষণ করলে উক্ত এলাকায় থাকতে পারবে।

- ৮.৩- বিভাগীয় অথবা জাতীয় পর্যায়ে শ্রেষ্ঠ অর্জনকারী এবং জাতীয় প্রাথমিক শিক্ষা সপ্তাহের সাংস্কৃতিক অনুষ্ঠানে অংশগ্রহণকারী শিক্ষকদের বিশেষ বিবেচনায় বদলির বিষয়টি বিবেচনা করা যাবে;
- ৮.৪- পদ শূন্য হওয়ার পূর্বে শিক্ষকদের বদলির অগ্রিম আদেশ প্রদান করা যাবে না;
- ৮.৫- এই নির্দেশিকার কোন অনুচ্ছেদে বর্ণিত শর্তাদি স্পষ্টীকরণের প্রয়োজন হলে প্রাথমিক ও গণশিক্ষা মন্ত্রণালয় এ বিষয়ে ব্যাখ্যা প্রদান করতে পারবে;
- ৮.৬- এই নির্দেশিকা রাজশাহী, খাগড়াছড়ি এবং বান্দরবান পার্বত্য জেলাসমূহের জন্য অনুসৃত হবে না। তবে, এই নির্দেশিকার আলোকে পার্বত্য জেলা পরিষদসমূহ সংশ্লিষ্ট জেলার উপযোগী নির্দেশিকা প্রণয়ন করতে পারবে;
- ৮.৭- প্রাক-প্রাথমিক এর সহকারী শিক্ষকগণও অন্যান্য সহকারী শিক্ষকগণের মত এই বদলি নির্দেশিকা অনুযায়ী যে কোন শূন্য পদে বদলি হতে পারবে;
- ৮.৮- এই নির্দেশিকা জারির ফলে ইতঃপূর্বে জারিকৃত শিক্ষক বদলি সংক্রান্ত সকল নির্দেশিকা, প্রজ্ঞাপন ও আদেশ বাতিল বলে গণ্য হবে।

স্বাক্ষরিত/-

তারিখ: ০৪/০৩/২০১৯

মো: আকরাম-আল-হোসেন
সচিব

২০ ফাল্গুন ১৪২৫


তারিখ:-----

০৪ মার্চ ২০১৯

নং- ৩৮.০০৮.০২২.০০.০০.০০২.২০১১-১৩১

কার্যার্থে:

১. চেয়ারম্যান, পার্বত্য জেলা পরিষদ, খাগড়াছড়ি/রাঙামাটি/বান্দরবান।
২. মহাপরিচালক, প্রাথমিক শিক্ষা অধিদপ্তর, সেকশন-২, মিরপুর, ঢাকা (সংশ্লিষ্ট সকলকে অবহিতকরণের অনুরোধসহ)।
৩. মহাপরিচালক, বাধ্যতামূলক প্রাথমিক শিক্ষা বাস্তবায়ন পরিবীক্ষণ ইউনিট, শিক্ষা ভবন, ঢাকা।
৪. মহাপরিচালক, জাতীয় প্রাথমিক শিক্ষা একাডেমী (নেপ), ময়মনসিংহ।
৫. মাননীয় প্রতিমন্ত্রীর একান্ত সচিব, প্রাথমিক ও গণশিক্ষা মন্ত্রণালয়, ঢাকা।
৬. জেলা প্রশাসক.....(সকল)
৭. সচিব মহোদয়ের একান্ত সচিব, প্রাথমিক ও গণশিক্ষা মন্ত্রণালয়, বাংলাদেশ সচিবালয়, ঢাকা।
৮. বিভাগীয় উপপরিচালক, প্রাথমিক শিক্ষা, ঢাকা/রাজশাহী/খুলনা/চট্টগ্রাম/বরিশাল/সিলেট/রংপুর/ময়মনসিংহ বিভাগ।
৯. প্রোগ্রামার, প্রাথমিক ও গণশিক্ষা মন্ত্রণালয়, ঢাকা (নির্দেশিকাটি ওয়েব সাইটে প্রকাশের অনুরোধ করা হলো)।
১০. জেলা প্রাথমিক শিক্ষা অফিসার..... (সকল)
১১. উপজেলা/থানা শিক্ষা অফিসার.....(সকল)
১২. অতিরিক্ত সচিবের ব্যক্তিগত কর্মকর্তা, প্রাথমিক ও গণশিক্ষা মন্ত্রণালয়, বাংলাদেশ সচিবালয়, ঢাকা।
১৩. সংরক্ষণ নথি।


(মো: মাহবুবুর রশীদ)

উপসচিব